



Convenio entre a Consellería de Cultura, Educación e Ordenación Universitaria e a empresa VIAQUA, Gestión Integral de Aguas de Galicia, S.A.U., sobre a colaboración educativa nas ensinanzas de formación profesional

En Santiago de Compostela, dous de xuño de dous mil dezasete

REUNIDOS

Don -----, conselleiro de Cultura, Educación e Ordenación Universitaria da Xunta de Galicia, en representación desta consellería, e de conformidade coas atribucións conferidas no artigo 34 da Lei 1/1983, do 22 de febreiro, de normas reguladoras da Xunta e da súa Presidencia e nos Decretos 146/2016, do 13 de novembro, polo que se fixa a estrutura orgánica da Xunta de Galicia e 4/2013, do 10 de xaneiro, polo que se establece a estrutura orgánica da de Cultura, Educación e Ordenación Universitaria.

E don -----, director de VIAQUA, Gestión Integral de Aguas de Galicia, S.A.U., actuando en nome e representación da empresa, segundo consta en poder outorgado ante don -----, notario do Ilustre Colexio Notarial de Madrid, con número de protocolo 688 e data do 9 de maio de 2016.

Interveñen en función dos seus respectivos cargos no exercicio das facultades que en nome das entidades que representan, teñen conferidas e,



EXPOÑEN

1. Que a Lei orgánica 8/2013, do 9 de decembro, para a mellora da calidade educativa, modifica a redacción do apartado 2 do artigo 39 da Lei orgánica 2/2006, do 3 de maio, de educación, e determina no seu punto 32 que a formación profesional, no sistema educativo, ten por finalidade preparar ao alumnado para a actividade nun campo profesional e facilitar a súa adaptación ás modificacións laborais que podan producirse ao longo da súa vida, contribuír ao seu desenvolvemento persoal e ao exercicio dunha cidadanía democrática, e permitir a súa progresión no sistema educativo e no sistema de formación para o emprego, así como a aprendizaxe ao longo da vida.

Igualmente, modifícase a redacción do apartado 2 do artigo 42, que contempla que o currículo das ensinanzas de formación profesional incluírá unha fase de formación práctica nos centros de traballo, da que poderán quedar exentos quen acredite unha experiencia laboral que se corresponda cos estudos profesionais cursados. As Administracións Educativas regularán esta fase e a mencionada exención.

2. Que a Lei orgánica 5/2002, de 19 de xuño, das cualificacións e da formación profesional, ten por obxecto a ordenación dun sistema integral de formación profesional, cualificación e acreditación que responda con eficacia e transparencia ás demandas sociais e económicas a través das diversas modalidades formativas. Con este fin créase o Sistema Nacional das Cualificacións e da Formación Profesional, e no seu marco orientaranse as accións formativas programadas e desenvolvidas en coordinación coas políticas activas de emprego e de fomento da libre circulación de traballadores.

3. Que o Decreto 114/2010, do 1 de xullo, polo que se establece a ordenación xeral da formación profesional do sistema educativo de Galicia, na súa disposición adicional segunda, contempla a relación coas empresas nos seguintes aspectos:

- a) A consellería con competencias en materia de educación promoverá a colaboración coas empresas e entidades empresarias e, en particular, coas máis implicadas en sectores clave da economía galega e as relacionadas cos sectores emerxentes.
- b) Esta colaboración ten a seguinte finalidade:
 - Realización do módulo de formación en centros de traballo.



- Impartición de módulos profesionais incluídos en títulos de formación profesional ou módulos formativos incluídos en certificados de profesionalidade nas instalacións das empresas, nas condicións que se determine, co fin de garantir que a formación se realice cos equipamentos máis actuais.
- Uso polas empresas das instalacións e do equipamento dos centros, nas condicións que se determine, sempre que non interfiran no desenvolvemento das actividades docentes.
- Actualización profesional dos traballadores e as traballadoras, así como do profesorado. Esta formación poderá incluír estadias temporais do profesorado nas empresas, tanto para a formación dos seus traballadores e das súas traballadoras como para a actualización do profesorado.
- A validación das accións de formación desenvolvidas nas empresas, de acordo cos requisitos que se establezan, co fin de lles facilitar aos seus traballadores e ás súas traballadoras a obtención dun título de formación profesional.
- Desenvolvemento conxunto de proxectos de innovación.

c) A colaboración formalizarase mediante convenio.

4. Que VIAQUA, Gestión Integral de Aguas de Galicia, S.A.U. é unha empresa do sector do medioambiente que xestiona todos os procesos relacionados co ciclo integral da auga: a captación, a potabilización, o transporte e a distribución para o consumo cidadán con absolutas garantías sanitarias. O seu modelo está baseado na excelencia do servizo prestado a todos os clientes: fogares e empresas. A súa fortaleza fundaméntase na adaptación ás necesidades de todos os clientes sen excepción, na constante innovación tecnolóxica e na adecuada xestión do coñecemento, así como no uso sostible de todos os recursos de auga dispoñibles.

5. Que VIAQUA, Gestión Integral de Aguas de Galicia, S.A.U. conta co apoio, o asesoramento e a colaboración da Escola da Auga, institución do Grupo Suez especializada no deseño e desenvolvemento de programas de formación técnica dos profesionais do sector da auga e o medio ambiente, sendo a formación profesional una das súas liñas de actividade principal.



6. Que as empresas deben apoiar de forma explícita a aquel alumnado que elixa a formación profesional e apoiar a súa capacitación xa dende a fase de aprendizaxe permitindo completar a formación deste alumnado no centro de traballo.

7. Que as partes asinantes están dispostas a colaborar nas diferentes actuacións, previstas neste convenio, co obxectivo principal de adecuar a formación ás necesidades do sector industrial, promover a inserción laboral do alumnado e impulsar a formación profesional que se imparte en Galicia.

En consecuencia, as entidades asinantes, de conformidade co exposto, formalizan o presente convenio de colaboración no campo da formación e da aprendizaxe de acordo coas seguintes,

CLÁUSULAS

Primeira. Obxecto do convenio

O obxecto do presente convenio é establecer a colaboración no eido da formación profesional entre a Consellería de Cultura, Educación e Ordenación Universitaria e a empresa VIAQUA, Gestión Integral de Aguas de Galicia, S.A.U. (en adiante VIAQUA). Esta colaboración levarase a cabo nos seguintes campos de actuación:

- a) Establecemento dun programa de formación en centros de traballo (FCT), para o alumnado que curse formación profesional inicial e o desenvolvemento do mesmo nas instalacións da empresa VIAQUA.
- b) Orientación na formación e actualización do profesorado dependente da Consellería de Cultura, Educación e Ordenación Universitaria.
- c) Obtención de titulacións de formación profesional e certificados de profesionalidade por parte dos traballadores e das traballadoras de VIAQUA, dentro do Plan de recoñecemento da experiencia profesional que desenvolve a consellería.
- d) Impulsar un sistema de formación dual entendida como un conxunto de accións e iniciativas formativas, mixtas de emprego e formación, que teñen por obxecto a cualificación profesional do alumnado nun réxime de alternancia de actividade laboral nas empresas, que favoreza e complemente a adquisición das competencias profesionais do alumnado, coa actividade formativa recibida no centro educativo.



- e) Desenvolvemento de proxectos de innovación tecnolóxica ou científica e proxectos de innovación didáctica no ámbito da formación profesional nos centros públicos dependentes da Consellería de Cultura, Educación e Ordenación Universitaria.
- f) Cesión de equipamentos para a realización de prácticas nos centros de formación profesional.
- g) Calquera outra colaboración de interese para ambas as partes, emprendemento, prevención de riscos laborais, etc.

Segunda. Programa de formación en centros de traballo

Os centros dependentes da Consellería de Educación e Ordenación Universitaria que impartan ensinanzas de formación profesional determinarán, por escrito, o alumnado que vaia realizar o módulo de FCT nas instalacións da empresa VIAQUA para cada curso escolar e de acordo coas estipulacións previstas neste convenio. Neste documento, determinarase o seu calendario e o seu horario, que terá que axustarse ao previsto no correspondente módulo de FCT.

O centro de traballo responsabilizarase da formación do alumnado, para o que designará aos/ás titores/as responsables de cada área formativa. O centro educativo tamén designará un/ha titor/a ou titores/as que colaborarán co/a titor/a da empresa na elaboración do programa formativo e no apoio técnico ao alumnado.

Cada alumno/a asistirá ao centro de traballo provisto da súa tarxeta de identificación ou D.N.I., e observará as normas do centro de traballo no tocante á puntualidade, asistencia e comportamento. A empresa poderá desistir libremente de continuar a colaboración formativa, respecto de calquera alumno/a, por incumprimento das normas, abondando para iso unha comunicación escrita ao centro escolar, oído previamente o/a titor/a do/a mesmo/a.

O/A alumno/a non terá en ningún caso vinculación laboral coa empresa, non podendo establecerse entre esta e aquel/a ningunha relación contractual, nin sequera baixo as modalidades de contratos formativos, previstos no artigo 11 do Real decreto lexislativo 2/2015, do 23 de outubro, polo que se aproba o texto refundido da Lei do Estatuto dos Traballadores, polo que o alumnado acollido a este convenio queda absolutamente excluído da lexislación laboral. Durante o período de prácticas concertado non se poderá formalizar ningunha modalidade de contrato de traballo entre a empresa e o/a alumno/a, mentres non se



revoque expresamente o concerto de colaboración formativa entre o centro educativo e a dirección da empresa, respecto dese/a alumno/a.

Os riscos por accidentes de traballo derivados da realización das prácticas, tanto se afectan ás cousas ou a terceiros coma ao propio alumnado, incluídos os constitutivos de invalidez ou determinantes de morte, quedan cubertos por unha póliza de seguro colectivo adicional de carácter civil que ten subscrita a Consellería de Cultura, Educación e Ordenación Universitaria.

Terceira. Formación e actualización do profesorado

Á proposta dunha das partes implicadas poderanse organizar cursos, seminarios, estudos, etc., sobre temas referentes ás novas tecnoloxías de común interese, tanto para persoal específico da empresa VIAQUA, dentro das súas posibilidades, como da Consellería de Cultura, Educación e Ordenación Universitaria.

Para tal fin, a empresa colaborará, mediante o oportuno apoio técnico e loxístico, no programa de formación do profesorado e máis concretamente nas estancias en empresas por tempo definido, para o profesorado de formación profesional e segundo as necesidades de formación, previstas na convocatoria de estadias en empresas que anualmente promove a Consellería de Cultura, Educación e Ordenación Universitaria.

A empresa VIAQUA colaborará na formación e actualización do profesorado, dependente da Consellería de Cultura, Educación e Ordenación Universitaria, en aquelas técnicas e tecnoloxías que considere de interese, e especialmente colaborará na obtención do título de especialización didáctica previsto para o profesorado de formación profesional inicial conforme ao Real decreto 118/2004, do 23 de xaneiro, (BOE 4/02/2004), modificado polo Real decreto 1258/2005, do 21 de outubro (BOE 8/11/2005).

Cuarta. Recoñecemento da experiencia laboral dos/as traballadores/as de VIAQUA

Dentro do Plan de recoñecemento da experiencia profesional, a Consellería de Cultura, Educación e Ordenación Universitaria analizará coa empresa VIAQUA a posibilidade de acreditar a experiencia profesional dos/as traballadores/as da empresa e convocar aquelas cualificacións profesionais vinculadas a determinados postos de traballo da mesma.



Quinta. Impulso ao sistema de formación profesional dual

A empresa VIAQUA colaborará no impulso da formación profesional dual e doutras formacións en alternancia do sistema educativo a través da divulgación e implantación da formación profesional dual nos centros de traballo da empresa. Neste sentido, valorará as posibilidades de poñer en funcionamento un proxecto de formación dual co obxecto da cualificación profesional do alumnado nun réxime de alternancia de actividade laboral na empresa, que favoreza e complemente a adquisición das competencias profesionais do alumnado, coa actividade formativa recibida no centro educativo. Este proxecto formalizarase coa firma dun convenio específico.

Sexta. Desenvolvemento de proxectos de innovación

Dentro das iniciativas de innovación da Consellería de Cultura, Educación e Ordenación Universitaria promoveranse as actuacións conxuntas da consellería e da empresa VIAQUA tanto no desenvolvemento de proxectos de innovación nos centros educativos de formación profesional como calquera outra iniciativa que potencie a transferencia de coñecemento, buscando a calidade e a excelencia na formación profesional.

Sétima. Cesión de equipamentos

Como soporte práctico ás actividades de formación do alumnado, a empresa VIAQUA poderá ceder, en función da súa dispoñibilidade, aos centros educativos que impartan ensinanzas de formación profesional e dependentes da consellería, aqueles equipos axeitados para a súa utilización na formación práctica destas ensinanzas.

Oitava. Outras colaboracións entre centros educativos e a empresa VIAQUA

Establecemento de liñas de colaboración entre os centros que impartan formación profesional e a empresa VIAQUA para a:

- Promoción do emprendemento entre o alumnado, xa sexa a través de charlas sobre as experiencias da xuventude emprendedora, como de calquera outra iniciativa.
- Colaboración coa consellería no plan de prevención de riscos específicos nos centros de formación profesional.
- Organización dun programa de visitas á empresa dirixido ao alumnado de educación secundaria, dos centros educativos de Galicia, co fin de estimular a formación



profesional entre o alumnado. Estas visitas incluírán sesións de orientación e presentación da empresa.

Novena. Comisión de seguimento

Establecerase unha comisión de seguimento, control e supervisión, que se reunirá cando se considere oportuno por calquera das partes asinantes.

Esta comisión estará constituída por:

- Dúas persoas representantes da Consellería de Cultura, Educación e Ordenación Universitaria.
- Dúas persoas representantes da empresa VIAQUA.
- Una persoa funcionaria da Consellería de Cultura, Educación e Ordenación Universitaria que actuará como secretaria.

Décima. Cuestiones adicionais

Este convenio de colaboración poderá ser complementado coa firma dos respectivos Convenios Específicos que desenvolvan calquera dos aspectos nel contemplados.

Décimo primeira. Vixencia do convenio

O convenio entrará en vigor na data da súa sinatura e terá unha vixencia de catro anos, podendo prorrogarse por acordo das partes mediante a addenda correspondente. Non obstante, o convenio poderá denunciarse por calquera das partes; a denuncia deberá realizarse por escrito e con dous meses de antelación á data prevista de finalización do convenio.

Décimo segunda. Protección de datos

De conformidade co disposto na Lei orgánica 15/1999, do 13 de decembro, de protección de datos de carácter persoal, e co Real decreto 1720/2007, do 21 de decembro, polo que se aproba o Regulamento de desenvolvemento da citada Lei orgánica, o alumnado e a empresa que por razón das actividades formativas teñan acceso a datos de carácter persoal, non disporán dos mesmos con finalidade distinta á esixida polas accións formativas.



Décimo terceira. Publicidade do convenio, transparencia e bo goberno

A firma deste convenio suporá o consentimento expreso do interesado á administración para incluír e facer públicos os datos referidos ao convenio de conformidade co artigo 15 da Lei 1/2016, do 18 de xaneiro, de transparencia e bo goberno, co artigo 8 da Lei 9/2013, do 9 de decembro, (BOE 10-12-2013) de transparencia, acceso á información pública e bo goberno e co Decreto 126/2006, do 20 de xullo, polo que se regula o Rexistro de Convenios da Xunta de Galicia.

Décimo cuarta. Carácter administrativo do convenio

O presente convenio de colaboración posúe carácter administrativo por razón do contido e materias sobre as que o mesmo versa, as cales ao abeiro do disposto no artigo 4 do Real decreto legislativo 3/2011, do 14 de novembro, polo que se aproba o texto refundido da Lei de contratos do sector público, o exclúen do seu ámbito de aplicación, sen prexuízo da aplicación dos principios desta lei para resolver as lagoas ou dúbidas que a súa aplicación suscite.

Dada a natureza administrativa deste instrumento xurídico, as controversias ou cuestións litixiosas que puideran xurdir na súa aplicación e non puidesen ser solucionadas no seo da comisión de seguimento, serán resoltas pola xurisdición contencioso-administrativa.

E en proba de conformidade co exposto, ambas as partes firman o presente convenio por triplicado, no lugar e data indicados no encabezamento.

O conselleiro de Cultura, Educación e
Ordenación Universitaria

O director de VIAQUA, Gestión Integral de
Aguas de Galicia, S.A.U.
